

## **Catulli Veronensis Carmina selecta**

### **Il "tema di Lesbia"**

5

**Vi**uamus, mea **Lesbia**, **atque amemus**,

**rumoresque senum seueriorum**  
**omnes unius aestimemus assis.**  
**Soles occidere et redire possunt;**

**nobis cum semel occidit breuis lux,**  
**nox est perpetua una dormienda.**

**Da mi basia mille, deinde centum,**  
**dein mille altera, dein secunda centum,**

**deinde usque altera mille, deinde centum;**

**dein, cum milia multa fecerimus,**  
**conturbabimus illa, ne sciamus,**  
**aut ne quis malus inuidere possit,**  
**cum tantum sciat esse basiorum.**

7

Quaeris, quot mihi basiationes  
tuae, Lesbia, sint satis superque.  
quam magnus numerus Libyssae harenae  
laserpiciferis iacet Cyrenis,  
oraclum Iovis inter aestuosi  
et Batti veteris sacrum sepulcrum;  
aut quam sidera multa, cum tacet nox,  
furtivos hominum vident amores:  
tam te basia multa basiare  
vesano satis et super Catullost,  
quae nec pernumerare curiosi  
possint nec mala fascinare lingua.

8

**Miser** Catulle, **desinas inep-tire**  
et quod vides perisse perditum ducas.  
Fulsere quondam candidi tibi soles,  
cum ventitabas quo puella ducebat,  
amata nobis quantum amabitur nulla

11

Furi et Aureli, comites Catulli,  
sive in extremos penetrabit Indos,  
litus ut linge resonante Eoa  
tunditur unda,

43

Salve, nec minimo puella naso  
nec bello pede nec nigris ocellis  
nec longis digitis nec ore sicco  
nec sane nimis elegante lingua,  
decoctoris amica Formiani.  
ten provincia narrat esse bellam?  
tecum Lesbia nostra comparatur?  
o saeclum insipiens et inficetum!

51

**Ille mi** par **esse deo videtur,**  
**ille si fas est** superare **divos,**  
**qui sedens adversus identitem** te  
**spectat et audit**

58

Caeli, Lesbia nostra, Lesbia illa,  
illa Lesbia, quam Catullus unam  
plus quam se atque suos amavit omnes,  
nunc in quadriuis et angiportis  
glubit magnanimos Remi nepotes.

70

Nulli se dicit mulier mea nubere malle  
quam mihi, non si se Iuppiter ipse petat.  
dicit: sed mulier cupido quod dicit amanti,  
in vento et rapida scribere oportet aqua.

72

Dicebas quondam solum te nosse Catullum,  
Lesbia, nec prae me velle tenere Iovem.  
dilexi tum te non tantum ut vulgus amicam,  
sed pater ut natos diligit et generos.  
nunc te cognovi: quare etsi impensius uror,  
multo mi tamen es vilior et levior.  
'qui potis est?' inquis. quod amantem iniuria talis  
cogit amare magis, sed bene velle minus.

73

Desine de quoquam quicquam bene velle mereri  
aut aliquem fieri posse putare pium.  
omnia sunt ingrata, nihil fecisse benignest,  
immo etiam taedet, taedet obestque magis;  
ut mihi, quem nemo gravius nec acerbius urget,  
quam modo quae me unum atque unicum amicum habuit.

75

Huc est mens deducta tua mea, Lesbia, culpa,

atque ita se officio perdidit ipsa suo,  
ut iam nec bene velle queat tibi, si optima fias,  
nec desistere amare, omnia si facias.

76

Si qua recordanti benefacta priora voluptas  
est homini cum se cogitat esse pium,  
nec sanctam violasse fidem nec foedere in ullo  
divum ad fallendos numine abusum homines

85

Odi et amo. Quare id faciam fortasse requiris.  
Nescio sed fieri sentio et excrucior.

87

Nulla potest mulier tantum se dicere amatam  
vere, quantum a me Lesbia amata meast.  
nulla fides ullo fuit umquam in foedere tanta,  
quanta in amore tuo ex parte reperta meast.

92

Lesbia mi dicit semper male nec tacet umquam  
de me: Lesbia me dispeream nisi amat.  
quo signo? quia sunt totidem mea: deprecor illam  
assidue, verum dispeream nisi amo.

107

Si quicquam cupidoque optantique obtigit umquam  
insperanti, hoc est gratum animo proprie.  
quare hoc est gratum nobisque est carius auro,  
quod te restituis, Lesbia, mi cupido,  
restituis cupido atque insperanti, ipsa refers te  
nobis. o lucem candidiore nota!  
quis me uno vivit felicior, aut magis hac res  
optandas vita dicere quis poterit?

109

lucundum, mea vita, mihi proponis amorem  
hunc nostrum inter nos perpetuumque fore.  
di magni, facite ut vere promittere possit,  
atque id sincere dicat et ex animo,  
ut liceat nobis tota perducere vita  
aeternum hoc sanctae foedus amicitiae.

**Le linee della poetica**

1

Cui dono lepidum novum libellum  
arido modo pumice expolitum?  
Corneli, tibi: namque tu solebas  
meas esse aliquid putare nugas  
iam tum, cum ausus es unus Italorum  
omne aevum tribus explicare chartis,  
doctis, Iuppiter, et laboriosis.  
quare habe tibi quidquid hoc libelli,  
qualecumque quidem, patroni ut ergo  
plus uno maneat perenne saeclo.

14

Ni te plus oculis meis amarem,  
iucundissime Calve, munere isto  
odissem te odio Vatiniano:  
nam quid feci ego quidve sum locutus,  
cur me tot male perderes poëtis?  
isti di mala multa dent clienti,  
qui tantum tibi misit impiorum.  
quod si, ut suspicor, hoc novum ac repertum  
munus dat tibi Sulla litterator,  
non est mi male, sed bene ac beate,  
quod non dispereunt tui labores.  
di magni, horribilem et sacrum libellum!  
quem tu scilicet ad tuum Catullum  
misti, continuo ut die periret,  
Saturnalibus, optimo dierum!  
non non hoc tibi, salse, sic abibit:  
nam, si luxerit, ad librariorum  
curram scrinia; Caesios, Aquinos,  
Suffenum, omnia colligam venena,  
ac te his suppliciis remunerabor.  
vos hinc interea valet abite  
illuc, unde malum pedem attulistis,  
saeculi incommoda, pessimi poëtae!

35

Poetae tenero, meo sodali,  
velim Caecilio, papyre, dicas  
Veronam veniat, Novi relinquens  
Comi moenia Lariumque litus:  
nam quasdam volo cogitationes  
amici accipiat sui tuique.  
quare, si sapiet, viam vorabit,  
quamvis candida milies puella  
euntem revocet, manusque collo  
ambas iniciens roget morari,  
quae nunc, si mihi vera nuntiantur,  
illum deperit impotente amore.  
nam quo tempore legit incohatam

Dindymi dominam, ex eo misellae  
ignes interiorem edunt medullam.  
ignosco tibi, Sapphica puella  
musa doctior: est enim venuste  
Magna Caecilio incohata Mater.

38

Malest, Cornifici, tuo Catullo,  
malest, me hercule, et est laboriose,  
et magis magis in dies et horas.  
quem tu, quod minimum facillimumquest,  
qua solatus es allocutione?  
irascor tibi. sic tuos amores?  
paulum quidlibet allocutionis,  
maestius lacrimis Simonideis!

65

Etsi me assiduo defectum cura dolore  
sevocat a doctis, Hortale, virginibus,  
nec potis est dulces Musarum expromere fetus  
mens animi (tantis fluctuat ipsa malis:  
namque mei nuper Lethaeo gurgite fratris  
pallidulum manans alluit unda pedem,  
Troica Rhoeteo quem subter litore tellus  
ereptum nostris obterit ex oculis–  
<numquam ego te potero posthac audire loquentem,>  
numquam ego te, vita frater amabilior,  
aspiciam posthac? at certe semper amabo,  
semper maesta tua carmina morte canam,  
qualia sub densis ramorum concinit umbris  
Daulias, absumpti fata gemens Ityli):  
sed tamen in tantis maeroribus, Hortale, mitto  
haec expressa tibi carmina Battiadae,  
ne tua dicta vagis nequiquam credita ventis  
effluxisse meo forte putes animo,  
ut missum sponsi furtivo munere malum  
procurrit casto virginis e gremio,  
quod miserae oblitae molli sub veste locatum,  
dum adventu matris prosilit, excutitur;  
atque illud prono praeceps agitur decursu,  
huic manat tristi conscius ore rubor.

96

Si quicquam mutis gratum acceptumve sepulcris  
accidere a nostro, Calve, dolore potest,  
quo desiderio veteres renovamus amores  
atque olim iunctas flemus amicitias,  
certe non tanto mors immatura dolorist  
Quintiliae, quantum gaudet amore tuo.

116

Saepe tibi studioso animo verba ante requirens

carmina uti possem vertere Battiadae,  
qui te lenirem nobis, neu conarere  
tela infesta meum mittere in usque caput,  
hunc video mihi nunc frustra sumptum esse laborem,  
Gelli, nec nostras hic valuisse preces.  
contra nos tela ista tua evitabimus acta:  
at fixus nostris tu dabi' supplicium.

### Il "mito" della morte del fratello

Multas per gentes

v. carme 65 e 68

### Il poeta dell'aggressione verbale

41

Anneiana puella defututa  
tota milia me decem poposcit,  
ista turpiculo puella naso,  
decoctoris amica Formiani.  
propinqui, quibus est puella curae,  
amicos medicosque convocate:  
non est sana puella, nec rogare,  
qualis sit, solet aes imaginosum.

49

Disertissime Romuli nepotum,  
quot sunt quotque fuere, Marce Tulli,  
quotque post aliis erunt in annis,  
gratias tibi maximas Catullus  
agit pessimus omnium poeta,  
tanto pessimus omnium poeta,  
quanto tu optimus omnium patronus.

94

Mentula moechatur. 'moechatur mentula?' certe.  
'hoc est quod dicunt: ipsa olera olla legit.'

108

Si, Comini, populi arbitrio tua cana senectus  
spurcata impuris moribus intereat,  
non equidem dubito quin primum inimica bonorum  
lingua exsecta avido sit data vulturio,  
effossos oculos voret atro gutture corvus,  
intestina canes, cetera membra lupi.